

## He Whakatau

Me mātua pānui kia mārama rawa koe ki ngā whārangi 8–14 o tēnei pukapuka.



## He whakarāpopoto

Pānuihia te whakarāpopoto ki te ākonga. He kōrero mō tētahi tamaiti e pīrangī ana ki te noho hei toa mō tēnei mea te whawhai. Ka tutuki i a ia?

## He kupu whakataki

Kia kaha ki te whakamahi i ngā wheako, me ngā mōhio o ngā ākonga. Kia hāngai tonu te whakatenatena ki te whakauru i ngā ākonga katoa. Me whakatītina rawa te pūkenga tiro whakamua. Matapakihia ngā kupu hou, me mahi rawa te papa kupu me ngā whakaahua kei te uhi. Me whakamaumahara hoki te ākonga kia pātai ki a ia anō, i te wā e pānui ana ia mai i te fimatanga ki te mutunga o te pānui.

Kōrerorerotia te hiahia ki te eke ki tētahi taumata pūkenga kua whakaritea kia whakawhiwhia ai koe ki tētahi tohu, tiwhikete rānei. Matapakia te nui o te wā me whakapau e koe ki te whakaharatau me te kaha tohenga e hiahiatia ana. Tirohia te whakatauāki “Whāia te iti kahurangi, ki te tuohu koe me he maunga teitei”.

Matapakia ngā aronganui ina tutuki te whāinga.

He aha te kōrero mai o te taitara ki a mātou mō ngā paetaenga e hiahiatia ana e te tamaiti?

## He Matapaki

### Tirohia te pai o te pānui a te ākonga

I te wā o te matapaki me pānui te ākonga i te katoa, i tētahi wāhanga noa iho rānei, o te pukapuka ki a koe. Kātahi ka:

- whakanui, āta tatari, whakahau tika;
- titiro mēnā e tika ana, e pai ana hoki (mā te tatau i ngā hē), te rere o te reo;
- titiro mēnā e mārama ana mā te whai i tētahi o ngā huarahi e whai ake nei;
  - te pātai i ngā whakapuaki māramatanga me ētahi e tika ana, ā, whakaritea kia kōrero anō te ākonga i tētahi wāhanga o te pakiwaitara ki āna kupu ake;
  - te pātai mō tētahi āhuatanga o te pakiwaitara, arā, te kaupapa, te ritenga, ngā ariā matua, te raupapatanga, ngā kiripuaki;
  - te whakatenatena i te ākonga mō tana tiro ki mua i whakaputa ai ia i te wā o te whakataki.

## Whakaarohia he aha atu hei mahi mā te ākonga

Me whakahau te ākonga:

- ki te whakamahi anō i te pukapuka i te taha o te mihini rīpene kōrero, i tōna kotahi rānei;

- ki te whakaoti i tētahi o ngā hei mahi e pā ana ki te pukapuka;
- ki te whakaharatau kia eke te ākonga ki tētahi atu taumata.

## He whakapuaki māramatanga me ngā whakautu

1. Ka whiwhi te tamaiti i te aha?
2. I ako ia ki te aha kia whiwhi ia i taua tātua?
3. He aha ōna whakaaro i tana whiwhinga i tōna tātua tuatahi?
4. Ki ōu whakaaro, i pēhea ngā whakaaro o tōna kaiako me ōna hoa?
5. He aha te mea uaua rawa atu o te whiwhi i tētahi tātua pērā i tērā?

1. Ka whiwhi te tamaiti i tōna tātua tuatahi.
2. I ako ia ki te kiki, whana, patu, meke.
3. He tino koa rawa tōna ngākau.
4. Ka rerekē ngā whakautu.
5. Ka rerekē ngā whakautu.

## He Mahere – Hei Tautoko i te Reo

E whai ake nei ētahi huarahi hei mahinga ngātahi mā ngā ākonga. Tirohia ngā whārangi kei te Tirohanga Whānui mō ngā tino āhuatanga o te pukapuka nei.

## Te pūtake

**T** He tautuhi i tētahi raupapatanga.

## He whakatakinga ā-roto, he whakaharatau

I mua i te pānui i te pukapuka, matapakia te koronga ki te eke ki tētahi taumata ake i roto i tētahi toi taua pēnei i te mamau, te mau rākau rānei. Tirohia te āhua o te āta haere o te ako. Matapakia te hiahiatanga me whakaharatau, me tohe, me noho ū ki te kaupapa.

Kia oti i te ākonga te pukapuka te pānui, kōrero mō ngā kare ā-roto ina tutuki te taumata e hiahiatia ana. Me pēhea ērā atu tāngata pēnei i ō kaiako, hoa rānei koe e tautoko ai ki te whakatutuki i ō whāinga?

Tonoa te ākonga ki te tautuhi i ngā mahi matua e whā i roto i te kōrero nei (pēnei i te kiki, te whana, te meke, te patu). He aha ngā huarahi rerekē e whāia ana e te tamaiti ki te whakawhanake i ēnei pūkenga me te raupapa i puta ai aua pūkenga i roto i te kōrero.